

Hset Côlose

Bàu hmàih ka oh daq

1 .. ¹ Phaulô tiaq manoh da Boc Plinh enh , jah creo broq mangai tiaq cla da Chuaq Jesus Christ xam Timothê aih oh daq bèn ² achi ka oh daq bèn ma oe ta Côlose aih ka bài mangai hadròeh rai ùh tablòq manoh ta Christ , waiq kan tabòeh dech xam kan catèm enh Boc pl ình aih Baq bèn trùh ta oh daq

Bàu manè xam bàu waiq khàn ,,,

³ Jò waiq khàn am ka oh daq ,nhèn ùh hêq ka manè apôi Boc plinh aih Baq da Chuaq Jesus Christ bèn ⁴ majah qmang aih nhèn khoe hìa trùh manoh lùì da oh daq ta Chuaq Jesus Christ xam manoh oh daq loq waq ka mangai da Boc plinh ⁵ manoh xam kan loq waq aih plôh loh enh kan tangèh ma khoe padon òòeq ka oh daq ta plinh , aih la bài yiniq enh adroe kô nêh oh daq khoe canòm ka trong Bàu lem joq qnàng òòeq canau loq ⁶ trong Bàu lem aih khoe trùh ta oh daq , hanoh qmang aih diq trong Bàu lem khoe caqmon loh plì rai yòng kàn jàp ta crõng taneh . Patep pang hì oh daq khoe jah tàng kan tabàih dech da Boc Plinh rai hõc waq ka jah loq qmòe ka joq qnàng kan tabòeh dech aih . ⁷ Wop qmang ka Êphapra aih mangai abroq qmoeq qmang ma haten hatia ti nhèn khoe hnài oh daq , haq wiang ka nhèn qmang ka mangai patih ùh tablòq manoh ka Christ . ⁸ Haq hadai khoe anoe ka nhèn loq manoh loq waq da oh daq ma khoe chiùq enh Yiang Hadròeh . ⁹ Aih ìq , nhèn hanoh qmang aih , patep pang hì nhèn hìa trùh oh daq , nhèn ùh hêq ka waiq khàn am ka pì . Nhèn waiq Boc Plinh ùc bình ka oh daq kan rabiaq loq trong manoh haq ma enh , tiaq ajang kan rabiaq kan loq da Yiang Hadròeh am . ¹⁰ Òòeq oh daq rih acaq ma tajì ka Chuaq , jah lem manoh haq rìm trong , loh rìm yiniq broq lem , èh rai yòng kàn ta kan loq ka Boc Plinh , ¹¹ canòm kan i cwiàng itai ranhòm da haq , jah padren rìm trong , òòeq oh daq i kan loq kềm dràng àt bàc trong . ¹² rai dèch kan manè apôi am ka Baq , aih mangai ma khoe broq ka oh daq tajì ka jah kùng hang ti bài mangai hadròeh ta diac qngah qngai . ¹³ Haq khoe paclaih bèn loh khoe ka cwiàng da kan clam cluiq , broq ka bèn jah qnhac atõc ta diac Kon haq ma diq jaq loq waq dèh . ¹⁴ enh dalam Kon aih bèn i kan baxon dèch , aih la kan caqnaih yiniq lui .

Cwiàng haqnhèq diq jaq da kon Boc Plinh

¹⁵ Haq aih raq dua qmù da Boc Plinh ùh jah hnoq , aih la Mangai i adroe dõng ka rìm yiniq ma khoe jah broq loh . ¹⁶ Majah qmang aih rìm yiniq diq khoe jah broq loh enh dalam ka haq , yac ka ta trõc yac ka ta taneh , ngè xau hnoq ngè ùh xau hnoq, yac ka bùa , yac ka bài cla craq , bài wèq cwiàng , rìm yiniq diq khoe jah broq loh enh dalam ka haq rai òòeq ka haq . ¹⁷ Haq i adroe ka rìm yiniq èh rìm yiniq yòng cajap enh dalam ka haq . ¹⁸ Èh hadai Haq aih raq gàu da chac hamac , aih la gàu da Tagop Hadròeh . Haq la baxèm la kon ramua da bài mangai rih hlài

enh kan cachit ,đòeq ta rìm yiniq haq yòng qmòe adroe . ¹⁹ Majah qmang aih Boc Plinh khoe bùi manoh broq rìm yiniq ma bình bauq ta rađeh jah oe ta haq .²⁰ èh xi mahim haq talong pagat , khoe jah broq loh kan hatroq , đòeq rìm yiniq ta taneh ta troc diq canòm ka haq đòeq jah hatroq ka cla Boc Plinh .

²¹ Da oh daq hòm hì adroe nèh hangai ka Boc Plinh , manoh tablêq hlài ka haq ajang nòe trong dù da rađeh ma broq , ²² mahaq manòeq kô Boc Plinh khoe canòm kan cachit da Kon haq ma khoe chiùq ta chac hamac xech akia đòeq broq oh daq hatroq , đòeq broq oh daq jah hadròeh yòng enh ngeà haq , ùh i ka xit ,ùh i ka nòe hu cwò . ²³ waq toq oh daq cajap manoh lùì Chuaq ùh talùi ùh talic enh kan tangèh khoe jah anoe qnoh xi trong Bàu lem oh daq ma khoe jah tàng , aih la trong khoe jah anoe qnoh taqne rìm yiniq jah broq loh ta caqnàm plinh , hloe xam au , Phaulô , la mangai patih ka trong aih .

Phaulô patih ka Tagop Hadròeh

²⁴ Manòeq kô au lem bùi ta kan xalep deh ma khoe jah patih ka oh daq , pàng Tagop Hadròeh aih la chac da Christ , dài au majah yốc deh chac hamac đòeq pòq wê rìm yiniq ma oe i ta kan xalep da haq . ²⁵ Au broq mangai patih ka Tagop Hadròeh aih tiaq bàu Boc plinh ma khoe taqmroq axong, aih la Mangai khoe thê au anoe hnài trong Chuaq ka oh daq ma gêh geo ²⁶ aih la kan hlèp ma khoe cadoc enh qnhòng calah nèh , yàng manòeq kô khoe jah paqnoh ka mangai da Boc plinh . ²⁷ Majah qmang aih Boc Plinh khoe ràih wì haq đòeq broq ka mangai diac wì jah loq kan padròng ranhòm da kan hlèp aih. Aih la Christ oe qne oh daq , aih raq kan tangèh trùh ta kan ranhòm . ²⁸ Haq aih raq nhèn ma anoe , yốc rìm kan rabiaq đòeq pariaq rìm ngai , hnài rìm ngai , đòeq paqnoh rìm ngai jah geo lem enh dalam ka Christ enh ngèa Boc Plinh . ²⁹ Aih iq raq dài au ma abroq , canòm ka padren haq wiang đòeq hu tablêq aih la padren qnang abroq i cwiang ta au .

2 ...

¹ Au enh oh daq loq dàng leq cadèh au khoe diq jaq tablêq am ka oh daq , ka mangai ma oe ta laodixê xam ka wì oh daq ma ùh hnoq hadrò au ,² dōq manoh wì aih jah prarông hujah pajùm mòeq ta kan loq waq , đòeq tangeà trùh ta kan qnì loq tòm taih ùh diq ùh dài ka cajap cajinh ,loh qmòe ka jah loq kan hlèp da Boc Plinh , aih la Christ , ³ enh dalam haq khoe cadoc hlèp rìm hang ma canaq da kan rabiaq , qnì loq .

⁴ Au doe qmang aih , dōq ùh hìaq i cabô yốc bàu padô đòeq hu qnùt oh daq. ⁵ Majah qmang aih yac ka chac au hangai , mahaq mahua yiang au dua oe ti oh daq , hnoq oh daq oe ti dabau i xèm goe rai cajap manoh lùì trùh Christ , aih joq au bùi raya .⁶ Oh daq khoe lùì Chuaq Jesus Christ qmang leq , drah cadiang lam enh dalam ka haq qmang aih , ⁷ drah grap riah rai bìn xèm enh dalam ka haq , yốc manoh lùì broq ka cajap , tiaq qmang ka oh daq ma khoe jah hnài rai ùh diq ùh dài ta kan manè apôi . ⁸ Ngan oq , apaq dōq wì yốc bàu atac rabiaq xam bàu dech , tiaq bàu taqmon da kon mangai , ranenh da qnhòng kô , ùh tiaq trong da Christ, đòeq rùp oh

daq iu tiaq , ⁹ majah qmang aih enh dalam ka Christ khoe tòm yiang da Boc Plinh tiah gleq i qmòe chac ¹⁰ èh hòmh enh canòm ka Christ oh daq khoe jah trùh ta kan tàu tia, majah qmang aih haq aih raq gàu da rìmh cwàng xam rìmh padren dèh . ¹¹ Oh daq hadai chiùq kat akia enh dalam haq , ùh xài kat akia enh tì kǝng kon mangai , mahaq ramènh kat akia da Christ , aih la lèh cađac kon mangai dũh . ¹² Oh daq khoe jah catũh ti haq xi ramènh baptem , aih hadai jah rìh hlài ti haq xi manoh lũi ta cwàng itai Boc Plinh , aih la mangai khoe broq ka haq rìh hlài enh kan cachit . ¹³ Jò oh daq khoe cachit dèh ka yiniq lui rađeh xam xech akia ma ùh kat akia , aih Boc plinh khoe broq ka oh daq jah rìh hlài ti Christ , majah qmang aih khoe lèh caqnaih dǝng da bèn yiniq lui . ¹⁴ Haq khoe xùt đac jàiq dòeh achìh đòeq hu tablêq ka bèn xam bòe ranenh ma pagau ka bèn , hit hloe jàiq dòeh aih rai tiang đình talong pagat . ¹⁵ Haq khoe caqnìh đac bòe cwàng ma broq gàu , xam bòe padren dèh , yǝc long pagat đòeq blêq wì aih rai patô qnoh dǝq ka mangai hnoq đeh hra ta phù crǝng .

Claih ka ranenh enh kon mangai

¹⁶ Qmang aih paq i cabô hadrah oh daq trong acaq ôq , tàng ùh meh hì ramènh , hì khê neo , hì Sabat , ¹⁷ aih đìq qmù da yiniq ma padon trùh , chac aih oe ta Christ . ¹⁸ Apa q đòeq bòe wì tau atùng yǝc da oh daq kan baha , aih la bài mangai enh patiah đeh kô ùh qnhèq qneq mahaq enh kũh waiq bình plinh . Wì haq tiaq bài trong đeh hnoq, xam kan daiq da xech akia wì haq loh ka padèh rađeh ùh loh cleq . ¹⁹ ùh i hatop ka gàu , canòm ka gàu aih đìq ka chac men jah taqmroq hatop xi bài atap , jah kan yòng kàn enh Boc Plinh .

²⁰ Tàng joq oh daq hadai cachit ti Christ khoe jah claih ka ranenh da kon mangai , aih hagleg majah oe dǝq bài yiniq kô panan rađeh tiah taiq ka oh daq oe rìh tiaq crǝng taneh kô . ²¹ ùh khòh wê , ùh khòh liah , ùh khòh bèq ? ²² Đìq ka bài yiniq aih waq toq hi troq aih hi loh ka raliang tiaq bàu da kon mangai ma hnài , ²³ yac ka enh gùng aih hnoq tiah gleq rabiaq , aih la kũh waiq tiaq deh manoh cla , ùh qnhèq qneq rai baxa dèh chac hamac , yàng ùh i jah cleq đòeq hu tablêq ka trong xech akia ma enh .

Kan rìh maneo ta Christ....

3 . ¹ Qmang aih tàng joq oh daq jah rìh hlài ti Christ , drah chaq bài yiniq oe ta plinh , aih noè Christ haqngui enh qma Boc Plinh . ² Drah tangèa manoh ta bài yiniq oe ta plinh, apa q ngèa manoh ta bài yiniq oe ta crǝng taneh , ³ majah qmang aih oh daq khoe cachit kan rìh dadeh khoe jah cadoc ti Christ oe ta dalam Boc Plinh . ⁴ jò leq Christ aih kan rìh da oh daq hi trùh, jò aih èh oh daq hadai jah trùh ti haq ta kan ranhòm .

⁵ Qmang aih , drah broq dǝq haq cachit bài yiniq da crǝng taneh kô oe ta chac oh daq , aih la trong taqnung tango , ùh hruah , manoh loq ònh , enh trong qmèq , daiq plai , daiq plai ùh crài cleq ka kũh waiq radua qmù , ⁶ taiq bài yiniq aih Boc Plinh majah caqnìh kan nòeh ka wì kon ma ùh iu . ⁷ adroe nèh oh daq rìh ta bài kan qmèq aih rai acaq oe qmang aih . ⁸ Mahaq manòeq kô ep cađac dǝng bòe yiniq aih , aih la kan nòeh , kan mahau xam kan dù . Apa q capoch troq

cabô ,ùh dùh i mòeq nà brùaq loh enh bàu oh daq .⁹ Apa qnùt dabau majah qmang aih khoe lêh đac kon mangai dùnh xam yineq broq da haq ,¹⁰ ðòeq caxùnh yôc mangai neo aih la mangai qnang wih wia neo tiaq dua da Mangai ma broq loh haq aih , ðòeq hujah trùh ta kan loq gêh geo.¹¹ Tacô pi i ka mangai Gorec, mangai Juđa ,mangai khoe kat akia , mangai dù , mangai Sythe , mangai broq hapông díc , mangai broq cla, mahaq Christ aih rìm yiniq ta rìm yiniq .¹² Qmang aih oh daq la mangai khoe jah raih da Boc Plinh , mangai hadròeh haq ma ðiq jaq loq waq ðeh , thê i manoh loq ha-och . Drah sràp yôc kan loq waq ,kan alàng , loq hamuan , khun khuq ,¹³ Tàng cabô taqne oh daq i cleq ùh troq ka dabau , aih thê taqnùh ka dabau rai lêh caqnaih yiniq lui ka dabau : Tiah ka Chuaq ma khoe lêh caqnaih yiniq lui ka oh daq qmang leq, oh daq hadai caqnaih yiniq lui ka dabau qmang aih ðiq .¹⁴ Mahaq enh qnhèq ðiq ðong ka bài yiniq aih ,ep caxùnh yôc kan loq waq , aih la caxi achauq bài kan lem geo .

¹⁵ Drah ðòeq kan catèm da Christ wèq ta manoh oh daq , oh daq hadai khoe jah creo trùh ta kan catèm aih oe ta mòeq chac ,drah paqnoh manoh loq manè apôi .

¹⁶ Drah ðòeq bàu da Christ bình bauq taqne oh daq ðôq oh daq ùh ðiq ùh dài ta kan rabiaq , Drah yôc calêu plinh , bài calêu hadròeh , calêu enh Yiang Hadròeh ðòeq hnài rai pariaq dabau, pàng khoe jah bình kan tabàih dech enh haq dài oh daq majah ep ðiq ka manoh calêu manè apôi Boc Plinh .¹⁷ Yac ka oh daq capoch yac ka oh daq abroq , ðiq ep canòm ka yiniq Chuaq Jesus ðòeq hu broq rìm trong , canòm ka haq ðòeq manè pôi Boc Plinh , aih la Baq .

Rìh ti dabau ta hnim .

¹⁸ Bài mangai broq mai , drah iu tiaq deh ông , qmang aih tajì troq ta Chuaq .¹⁹ Bài mangai broq ông , ep loq waq deh ka mai , apaq hadrùq hadriang ka wì haq .

²⁰ Bài mangai broq kon , rìm trong ep iu tiaq miq baq , majah qmang aih trong aih lem ka manoh Chuaq .²¹ Mangai broq baq ùh dùh jrôq chiu ðôq deh kon nòeh , yùq èh wì haq loq tagah tagôi ta manoh .

²² Bài mangai broq hapông , ta rìm trong ep loq iu tiaq bàu ðeh cla craq ta qnhòng kô , ùh xài patih toq enh ngèa wì haq qmang ka mangai enh aluàn yôc manoh wì ,mahaq jao manoh iu yùq ka Chuaq, ep patih xi manoh hnhuh jang .²³ Yac ka broq cleq dua ep ðiq ka manoh hu broq , tiah broq ka Chuaq ùh xài broq ka kon mangai .²⁴ majah qmang aih ep loq rameh ðeh kô èh jah kùng hang baha enh Chuaq . Oh daq qnang broq hapông ka Christ aih Chuaq .²⁵ Majah qmang aih cabô broq trong qmèq haq aih jah patem hlài trong qmèq ðeh ma khoe broq , ùh rong cabô.

4 . Bài mangai ma broq cla craq , drah aràng am kan taq atôq hnhuh jang ðeh ka bài hapông , majah qmang aih oh daq loq ðeh hadai i mòeq ngai Cla craq oe ta plinh .

Pariaq trong waiq khàn..

² Ep cajan manoh rai loq hmàng trong waiq khàn rai ep tam kan manè apôi . ³ Hadai waiq khàn am ka nhèn , ðòeq Boc Plinh pèch qmang ka trong bàu nhèn anoe hnài , qmang aih nhèn jah anoe qnoh kan hlèp da Christ , jao aih raq au majah oe qne caxi datoeq . ⁴ Waiq khàn ðòeq au jah anoe ka hloh kan hlèp aih , troeq au ep anoe . ⁵ Ep rabiaq ta trong pì acaq oe ti wì enh gùng , waq toq jò bu taqnàih . ⁶ Bàu da oh daq ma capoch tuàng jò leq xu ep bình kan la alàng , ep tah tam boh , ðòeq oh daq loq cabè padreo bàu ka tang ngai qmang leq cadèh .

⁷ Tichicô aih la oh daq nhèn ðiq jaq loq waq deh , mangai hapõng ùh taclah manoh da Chuaq , bua abroq ti au . Haq jah patin ka oh daq loq rìm yiniq da au . ⁸ Au thê haq trùh ta oh daq , ðòq pì loq nhèn manòeq kô qmang leq , ðòeq haq jah alòng manoh cliac pì . ⁹ Haq lam ti Ônesim aih la mangai ùh taclah manoh nhèn ma loq waq dèh qnàng , haq aih mangai mòeq gùng ka pì . Wa aih jah doe ka pì rìm yiniq qnang loh tacô

¹⁰ Aritac aih bua hanoh oe tù ti au , i bàu hmàih ka oh daq , Mòc aih kon oh kon daq ka Banaba hadai , (oh daq khoe jah bàu tanap trùh haq , tàng haq trùh ta oh daq , pì ep ðih haq ka alàng)

¹¹ Jêsu wì ma creô Juctu hadai i bàu hmàih ka oh daq . Taqne wì ma kat akia , toq wì piq ngai aih raq ma wiang patih ka diac Boc Plinh ti au , wì haq aih raq kan alòng manoh au.

¹² Ephapra , mangai mòeq gùng ka oh daq , hapõng da Chuaq Jesus Christ i bàu hmàih oh daq , haq ùh hêq ka tabàt am ka oh daq jò waiq khàn , ðòq oh daq jah geo gua rai ðiq manoh iu tiaq manoh Boc Plinh ma enh. ¹³ Au anoe ðòeq pì loq haq aih khoe abroq xalep ka pì oh daq xam ka mangai Laođixê hloe xam ka mangai Hi-êrabôli ¹⁴ Luca , bua da bèn haq aih bõcsi xam Êma bòch hmàih oh daq

¹⁵ Au tanap bàu hmàih trùh oh daq ta Laođixê xam Nimpha hloe xam Tagop Hadròeh ma tagop ta hnim haq . ¹⁶ Oh daq ðòc jàiq kô khoe èh am ka Tagop Hadròeh Laođixê ðòc ðiq , oh daq hadai ep ðòc jàiq enh Laođixê gòe trùh ðiq. ¹⁷ Doe ka Achip rameh : Ep rabiaq trong patih haq ma khoe canòm ka yiniq Chuaq ðòeq nhàn yõc , ðòeq hubroq ka gêh geo.

¹⁸ Tì kông cla au , Phaulô , achih hmàih ka oh daq . Hmàng trùh caxi datoeq da au ðiq . Waiq kan tabàih dech oe ti pì .

